
Morafadinotshe

Morafadinotshe

Buka I

ya go ithuta go buisa


E kwadilwe ke bakwadi

ba

Misione ya Hermannsburg

6th ed
Kgatiso ya VI

Published by the Hermannsburg Mission Book Depot
P. O. Box 76, Rustenburg, Transvaal
Printed by The Mission Press, P. O. Moorleigh, Natal — 1955



Jakobus More Mamogale

(Mmanotshe)


Morwa Kgosi Raikane,
Kgosi ya Bakwena ba Mogopa, le bomorwawe.



gn (1) 72/58

Bantu Studies Dept

1. MORAFADINOTSHE



1. A lo bona bana bale,
Botlhe ba ba binang fale?
Ba ntse ba thabile fela,
Lo ba utlwa ba opela.
Ga twe, buka ya **Mobedi**
Ba e ruta, ea re "fedi",
Se ké se se thabisang.
2. Jaana ba tlaa simolola
Buka e nngwe, ba e tshola
Go ya ba be ba e fetsa.
Yona e tlaa ba tsetsa
Thuto dintsi tsa bophelo,
Mme di tlaa ba bopa pelo.
Se ké se se thabisang.
3. Ké **Morafa'notshe** eo,
E 'rutang dithuto tseo.
E ba ruta ga Modimo,

Le molemo wa masimo,
Le ga Jesu Krist' Morena,
Gore ba tle kwa go Ena.
Kana ba tlaa thaba jang!

4. E ba ruta go rapela,
Le go baka ka difela;
E ba ruta phologolo
Tse dinnyane le tse kgolo,
Le bo kgomo, nku, podi,
Le nonyane, le mabodi.
Ruri, ba tlaa thaba jang!

5. Buka eo e monate,
Ké dinotshe, ga ke rate
Go re, bana, lo e tlhoke.
A bogolo lo itshoke,
Lo di rafe teng ga phalo:
Ithuteng ka tlhoafalo!
Ruri, lo ka thaba jang!

2. MODIMO LE MOTHO

Setshwano tshaloganyo

itshwarela

batlhanka

lefatsheng

tshabana

Jehofa ké Modimo wa rona, Modimo ké
Rara, le Morwa, le Moya.

Modimo Rara o re bopile, Modimo Morwa
o re rekolotse, Modimo Moya oa re itshepisa.
Motho o bopilwe kafa setshwanong sa Modimo.

Motho o na le nama le madi le moya le tlhaloganyo; kgomo ga e na moya, le tlhaloganyo ga e na nayo.

Modimo o rata motho thata; a le wena o rata Modimo? O re bopile, gore re nne mmogo le ona kwa legodimong. Kwa legodimong go teng kagiso le bontle.

Motho o leofela Modimo ka gale, mme Modimo oa mo itshwarela.

Mmoloki wa rona ké Krisete, leina le lengwe la gagwe ké Jesu. Jesu o rata bana, a re: "Lesang banyana ba tle go nna!"

Le wena o isitswe go ena ka kolobetso; go-pola kolobetso ya gago ka gale.

Moya wa Modimo o go gogela go Krisete, mme Krisete o go gogela go Rara. Ngwana wa Modimo o utlwa kodu ya Moya, mme o latela Krisete.

Batho ba lefifi ba tshaba lesedi, mme batho ba Modimo bona ba tsamaya mo leseding.

Krisete ké Morena wa rona, puso ya gagwe ké Kereke, batlhanka ba gagwe ké bakrisete.

Kereke mo lefatsheng leno ea tlabana, mme kwa legodimong e tlaa galalediwa.

3. BAGOLO LE BANA

Nkgonne nkgwana Mmangwane

mošabeng tshologetse

lefatsheng.

Bagolo ba rata bana, bana ba tlotla bagolo. Bagolo ba roma bana, mme bana ba utlwa bagolo. Bagolo ba naya bana dijo le diaparo, bana ba leboga bagolo ka go ba utlwa le go ba direla. Bagolo ba kgalemela melato ya bana. Lesego la bagolo le agela bana matlo.

Bagolo ba me ké rre le mme; rre o na le dikgomo, mmê o na le dikgogo le kolobe. Mmê kajeno o ile masimong. Rre o na le dinku le dipodi, mmê o loga tlatlana.

Moše o disa dinku, nkgonne ena o ile go batla dikgomo, nnake o ile kwa dinamaneng. Noa ga twe o timeditse, rraagwe o tlaa mo itaya. Aleta o ile mošabeng. Tabea o thubile nkgwana, metsi a mo tshologela; mmaagwe o tlaa mo omanya. Mmangwane o tlaa bopa e ngwe gape.

Tlotla rraago le mmaago, gore o tle o phele sentle, mme malatsi a gago a nne mantsi mo lefatsheng. O se nyatse bagolo, ha jaanong ba tsofetse. Gopola se ba se go diretseng mo bonyaneng jwa gago, o ba rate.

4. A - E - I - O - U

A a a Bonang banyana kwa!
Botlhe ba na le dibuka,
Ba itshwenya go ithuta.

A a a Bonang banyana kwa!

E e e Re ruta tse le tse:
Go buisa le go bala.
Go opela le go kwala.

E e e Re ruta tse le tse.

I i i Pula e rile "thii"!

Mme e setse e le nako
E ntse e na ka sefako.

I i i Pula e rile "thii"!

O o o Lo sa ntse lo re: Joo?
Etswe jaanong e khutlile,
Le dithuto di fedile.

O o o Lo sa ntse lo re: Joo?

U u u Utlwang, mme lo re "tu"!
Ka re, ha lo ithutile
Le lesego le fitlhile.

U u u Utlwang, mme lo re "tu"!

5. MASIMO LE MABELE

Masweu mahibidu lethogonolo sekgoa tlhagolwa monongwaga

Mariga a fetile, selemo se fitlhile. Kajeno goa otolwa, batlang dipetlwana. Basadi ba ya masimong, makgarebe a tsamaya le bona. Ba tshotse peo le dikoko, ba rwele medutwana ya metsi mo tlhogong. Banyana ba ba setse morago, ba belege maseanyana ka dithari.

Go jalwa mabele a masweu le a mahibidu. Lo se ka lwa lebala nyoba le thotse le legapu le dinawa le ditloo le maowane. Ba bangwe ba jala lebelebele; mmopo o jalwa morago.

Batho ba bantsi ba lema ka dipholo. Ba na le megoma ya sekgoa kajeno, e mengwe ebile ké ya dikara tse pedi. Ké batho ba ba lethogonolo, ba tlaa fetsa ka pele. Ke tlaa ipapatsa mo go bona, gore le nna ba ntemele.

Pula e nele bosigo. Mabele a setse a medile, bonang, masimo a talafetse. Tlhang, ekete ké mefero! E rata go bipa mabele. Kajeno goa tlhagolwa, dikolo di eme, ba botlhe ba ile masimong. Borre le bomme le bonkgonne le bonnake ba dule mo gae, ké nna ke salelang kwa morago.

Mabele a budule. Thaga re e kobile. Seboko le tsie ga di teng monongwaga. Kajeno goa kotulwa.



1. A re bakeng Modimo,
Gobane o molemo,
Ka nyoba re e nwele.
Magapu re a jele.

2. Difata di remilwe,
Mebopo e pegilwe,
Diboane di bopetswe,
Mabele a phuthetswe.

3. A re direng moletlo
Wa thobo le wa tlotlo,
Difala ka di tletse,
Di tshwana le dikgetse.

4. A thata ké ya rona,
E e re nayang tsona?
Ké sego la Morena,
Re tlaa leboga Ena.

6. MODISA LE DINKU

Mokutshwane	motshegare
Ela tlhoko	phokobye

Modisa o bolotsa dinku tsa gagwe, a di batlele mafulo a a monate. Dinku di rata majang a matala, a makhutshwane a pilo, ha e simolola go tlhoga. Le matlhare a meokana a molemo mo go tsona.

Ha majang a otlhe a godile, mme a omile, modisa o isa dinku mo maropeng. Kwa teng di ja phure. Phure ké maungo a mosu. Motshegare modisa o isa dinku kwa metsing.

Ha letsatsi le rata go phirima, o di busetsa kwa gae. O ya go di neela diwanyana. E e lapang oa e rwala. E e timelang oa e batla. Ga a le bale go ela e e tlhotsang tlhoko, o e tumola tshetlho kwa lesakeng. Go dira jalo modisa yo o molemo.

Mo marigeng modisa o isa dinku morakeng. Kwa teng o ikagela mokgoro, tsona a di agele lesakana.

Dinku di tshaba lesakana le leša, mme di gane go tsona mo go lona. Modisa foo a tsee kwanyana, a e lokele mo teng ga lesakana pele, jaanong dinku tse di amusang di e latele, di sa tlhole di tshaba.

Modisa o na le mpša, e robala fa mokgorong. E lala e bogola, e koba phiri le phokobyē. Motshegare o tsoma mebutla ka yona.

Mono re itse mefuta e mebedi ya dinku. Go na le nku ya sesotho le ya lefarlane. Ya sesotho e na le mogatla o mogolo o o tletseng mafura fela. Ya lefarlane e na le boboya jo bo molemo, jo bo rekwang ka tlhwatlhwa e kgolo. Go dirwa dikobo tsa mefutafuta ka jona. Dinku tsa mafarlane di phela bogolo kwa borwa, tsa sesotho tsona di phela bogolo mo dikgweng.

Abele le Moše le Dafide e ne e le badisa. Wena modisa wa gago ké mang?

7. JEHOFA KÉ MODISA WA ME

Pesalema 23.

1. Jehofa ké modisa wa me, ga nkitla ke tlhoka sepe.

2. Ó mpothisa mo mafulong a matalana, o nkisa ka bonolo fa metsing a a didimetseng.

3. O rudisa moya wa me, o nkgogela mo motlhaleng wa tshiamo ka ntlha ya leina la gagwe.

4. Mme le ha ke tsamaya mo mogorogorong wa moriti wa loso, ga nkitla ke boifa bosula bope, gonne ò na le nna, tsamma ya gago le seikokotlelo sa gago dia nkgomotsa.

5. O mpaakanyetsa modiro fa pele ga me, fa pele ga matlho a baba ba me, o tlotsa tlhogo ya me ka lookwane, senwelo sa me sea tshologo.

6. Ammaaruri, molemo le boitshwarelo di tlaa ntatela mo malatsing aotlhe a bophelo jwa me, mme ke tlaa aga mo tlung ya ga Jehofa ka boleele jwa malatsi.

8. MODIMO OA RE DISA

Setlhare

Mošabele

Tiragalo

tshoganetso

Basimane ba bararo ekile ba bo ba disitse dipodi tsa bona fa morago ga motse. E ne e le ba ba dinyaga tse e ka neng di le lesome gongwe go fetisa. Ba ne ba gotsitse mollo fa tlase ga setlhare se segolo sa mošabele. Setlhare seo se ne se eme fa thoko ga lengope, mme dikala tse ditelle tsa sona di okame leiso la bona.

Go ne go foka phefo e e maruru, gape ba ne ba rata go ja dipabe tsa mmopo o ba tlhagileng ba o tshotse. Yo mogolwane mo go bona a tsaya Tiragalo, a buisa mo go yona temana e ba e utlwileng kwa sekolong. Mme ba babedi ba bangwe ba sotetsa mollo, ba latlhela mmopo mo leupeng.

Ga bo go tla phefo e kgolo ka tshoganetso, ya digela mošabele godimo ga basimane. Mme le ha

setlhare se segolo seo se ne se na le dikala tse dintsi, ga se ga khutlega opê wa bona ba bararo bao, ba femetswe jalo ke Modimo.

Erile letshogo le sena go ba tlogela, ba tsaya dijô tse ba tlileng ka tsona kwa gae, ba di ja mo moriting o ba o diretsweng ke phefo mo tlase ga dikala tsa setlhare se se oleng. Le dipodi tsa bona tsa tla, tsa ja dikenya tsa setlhare tse di ntseng di di tlhaela.

9. BO A B C

Abrahame tumelong,
O mo etse bophelong.

Batho ba ba dumelang,
Ké ba ba tlaa bolokwang.

C ké tlhaka ya seeng,
Ga e dire Setswaneng.

David o bolaile leng
Tau le bere kwa nageng?

Eyang tirong tlhe mo bekeng,
Ka Sondag lo tle kerekeng.

Felix a tshoga mo pelong
Foko la Paulus mo therong.

Go gaufi jang bosakhutleng;
Ao motho, o tlaa reng mo teng?

Ha o ka fenya tumelong,
O tlaa ya kwa legodimong.

Itaya ngwana bonyaneng,
O tlaa go tlotla botsofeng.

Jaaka Josef kwa boeng,
O ithibe mo dibeng.

Kwa go busang Satane teng,
Ga go kagiso mo moeng.

Leleka ba ba tsietsang,
Mme tshola ba ba dumelang.

Mabele a o a byetseng,
A gola pila mo puleng.

Ngaka e e fodisang
Ké Jesu yo o rategang.

Opela mo boitumelong,
Se fele pelo bothokong

Poloko e tswa tumelong,
O se e batle mo tirong.

Rata Modimo mo pelong,
Le mokaulengwe mo tirong.

Setlhare sa 'go mo tshimong
O tlaa se itse maungong.

Thuto e e sa lokang
Ké more o o bolayang.

Utlwa tse di Beibeleng,
Ruri go bophelo teng.

Viktorija, re mo phenyong
Ha re ka sala tumelong.

Weine e tswa setlhareng,
Ha e tlotlhwa maroseng.

X ké tlhaka e e tswang
Segrikeng; se thata jang!

Yehofa yo o godimong,
Se mo lebale bophelong.

10. THAPELO YA MOKRISETE

Thapelo ké puô ya motho, e o buang le Modimo ka yona. Ngwana yo o molemo o bua le rraagwê ka gale. Bakrisete ké bana ba Modimo. Mokrisete wa nnete o bua le Modimo ka gale, o kopa mo go Rraagwe yo o rategang jaaka ngwana yo o rategang.

Mokrisete wa nnete ga a khutle go rapela, jaaka moa o sa khutle go tswa mo mothong, fa a hema. Motho yo o sa hemeng o sule. Mokrisete yo o sa rapeleng le ene o sule.

Bagolo ba ruta bana ba bona go rapela, le ha ba sa ntse ba le bannye. Se motho o se tlwaelang a sa le monnye, o tlaa se dira a godile. Ngwana wa Modimo, o rapela, ha a tsoga le ha a robala le fa dijong.

Ka thapelo motho o kopa mo Modimong se o se tlhokang, mme o o lebogela se o se tshotseng. Ké ka moo thapelo e leng kopo le tebogo.

Balepere ba ba lesome ba ne ba kopa phodiso mo go Jesu, mme thuso ya lebogelwa ke a le mongwe fela. A le wena oa tle o leboge? Itlwaetse go rapela, mme o se ke wa lebala go leboga.

Mokrisete o rapela Modimo mo ditlalelong tsothle. Modimo oa re: "Mpitsang mo tsatsing la tlalelo, mme ke tlaa lo golola." Jesu a re: "Kopang, mme lo tlaa newa." Moapostolo Poulo ena a re: "Rapelang ka gale."

11. DITHAPELO TSA BANA

(Tsa mesong, ha ba tsoga.)

1. Ke sa le ngwana bokoeng,
Ga ke na thata jang;
Mme ka ke le moeng fatsheng,
Ke tlaa bolokwa ka'ng?

2. Mmoloki yo o rategang,
A ko o nthuse tlhe,
Ke tshabe tse di leofisang
Mo tsatsing leno le.
Amen.

E nngwe gape

1. Ke go leboga mo mosong,
Modimo Rara godimong,
Ka o le yo o mphemetseng
Mo bosigong jo ' fetileng.

2. O ntshegofatse bophelong.
Ka tsatsi leno, Jesu Mong,
Ke dire tse di go kgathang,
Ke rate ba ba go ratang.
Amen.

Tsa mait siboya, ha ba robala

1. Mmoloki yo o rategang,
O nthuse yo ke robalang,
Mme o mphemele bosigong,
Ke lale ke le kagisong.
2. A ke go rate mo pelong,
O tle o nkise godimong,
Ke tsholwe kwa baengeding,
Ba ba go bakang mo seding.
Amen.

E nngwe gape

Mphemele ka diphuka,
Ao Jesu, go mpoloka
Jaanong mo bosigong.
Ha dira di ntlhasela,
Morena, di thibele,
Gore ke lale kagisong.

12. DITHAPELO TSA FA DIJONG

(Pele ga go ja.)

Morena Modimo, Rraetsho wa legodimo, re tshegofatse le tsona tse tsa gago, tse re di tsayang, O di re file ka lorato lwa gago, ka Jesu Krisete, Morena wa rona. Amen.

(Morago ga go ja.)

Morena Modimo, Rraetsho wa legodimo, re go leboga ka Jesu Krisete, Morena wa rona, ka ntlha ya masego a otlhe a gago, a o a re fileng, wêna yo o phelang le yo o busang ka bosenabokhutlo. Amen.

13. SONDAGA LE KEREKE



Sondaga ké letsatsi la Morena, le ebileng e le letsatsi la boikhutso. Ka Sondaga mesong re utlwa tshipi e lla. Kajeno ga go dirwe ditiro tsa lefatshe. Kajeno batho ba botlhe ba tshwanetse go direla Morena, le go direla poloko ya mewa ya bona bogolo go ka malatsi a mangwe. Batho botlhe ba tshwanetse go iketleeletsa go ya kwa kerekeng.

Kereke ké ntlo ya Modimo. Mo go yona re opela difela tsa boitshepo, re utlwa lefoko la Modimo, ebile re abelwa disakramente tsa boitshepo. Tshegofatso e kgolo ya lefoko le disakramente ké boitshwarelo.

Motho yo o tlohafaletseng poloko ya moya wa gagwe, o ya kerekeng. Yo o sa yeng kerekeng, o tlhokisa moya wa gagwe dijo tse di

o phedisang, mme moya o o sa jesiweng o tlaa lapa, o idibala, o latlhegelwa ke poloko.

Modimo le ona o ne wa dira ditiro tsa ona ka malatsi a le marataro, mme wa ikhutsa ka la bosupa. Ba e leng bana ba Modimo ba leka go tshwana le ona mo popegong le mo mekgweng.

Motho yo o ratang lefoko la Modimo, ga a kake a sala kwa gae, ha go ilwe kerekeng. Le gona ga a kake a robala gongwe a tshameka mo kerekeng, ha ba bangwe ba rapela gongwe ba utlweletse thero.

Kereke ké ntlo ya boitshepo, go tsenwa mo go yona ka tidimalo le ka thapelo. Ké mokgwa o o maswe go buabua le go tshameka mo kerekeng.

14. SE MORENA O SE BUANG KAGA SONDAGA

1. Go bua Rara godimong:
Malatsi a ke a tlhomang
A beke, ké a a supang,
Borataro ké jwa lona.
Mme lo batle mo go ona
Tse di tlhokwang bophelong.
2. La bosupa ké Sondaga,
Tsatsi la me la go ithuta,
Go ntirela le go nkutlwa,
Le go batla tsa poloko,
Tse di nkgodisetsang pako
Mo bakristeng ba ba tlhaga.

15. SE NGWANA O NANG NASO

Segokgo se na le ntlwana,
Legotlo le letlalonyana;
Nonyane e na le diphuka.

Mme wêna, ngwana, o na le eng?
“Ke na le ntatê, le mme o teng;
Kea ja, kea nwa, mme ke mo thabong.
Tsotlhe tse, di ntswela kwa Modimong.”

16. BASIMANE BA BABEDI

1. Bona go re, ke tshotse nonyane e ntle jang.

2. O e rekile mo go mang?

1. Ga kea e reka, ke e neilwe ké malome.

2. Ke solofela, ha o se nke o e tlhokisa sepe.
O e nee dijo, o bo o e dise, gore semake a se
atamele serobe se yona, gonne o ka e bolaya,
o e ja.

1. Ee, morwarra, ke tlaa e disa thata, mme
ke tlaa e ota ka mabele le bogobe, e tlaa bona
dijo ka botlalo. Ke tlaa e disa, gore semake
a se ka a e tshwara. Ha nka se ka ka e disa
pila, malome yo ke mo ratang a ka nkgalefela.

2. Ke bonye sentlhaga sa nonyane mo se-
tlhareng ka kwa nokeng. Eketse go na le ma-
mphorwana mo go sona. A re ye kwa teng.
Ke tlaa leka go tsaya mamphorwana ao, gore
le nna ke baane le nonyana.

17. NONYANE E RAPELA BASIMANE

1. "Ao, basimane, lo nkutlweng tlhe!"

Mme lo se tshware sentlhaga se,

Mme le ka matlho se se lebeng,

Gonne go bana ba me mo teng,

Ba ka lo tshoga, mme ba ka lela,

Ha le ka matlho lo ka ba leba.

Gopolang gape, ha a lo bona,

Rara wa botlhe, wa lona le rona.

2. Le ha basimane ba rata jang,

Ha ba ka tsaya tse ba di batlang,

Ba ema, ba se ke ba atamela,

Gonne ba rapetswe ka go lelelwa;

Mme le nonyane ya boela baneng;

Mme ya ba suba ka fa diphukeng;

Le basimane ya ba leboga,

Ka ba sa senya. Ké ha ba tloga.

18. SEATLA SE SE SE KENG SA ITAYA

Go kile ga swa mosimanyana, a swela mo tume-long go Jesu, Morena le Mmoloki wa gagwe. Moya wa gagwe wa ya kwa legodimong, kwa o bonyeng Mmoloki yo o rategang ka sefathlego teng.

Mmaagwe o ne a hutsafetse thata, mme a rata go ema ka gale fa serepeng sa moratiwa wa gagwe, a ise a isiwe kwa phupung.

Le jaanong o ne a eme fa go sona, a lebile sefa-tlhego sa ngwana, se se nang le popego ya kagiso. Morwadie, kgatsadi ya mosimane yo o suleng, le ena o ne a eme fa thoko ga mmaagwe, mme a eletsa go tshola seatla sa kgaitsadie yo o rategang gangwe le gape mo go sa gagwe.

Mmaagwe a tsaya seatla sa yo o suleng, mme a se baya mo go sa kgaitsadie. Mme ngwana yo, a atla seatla se se maruru se, mme a raya mmaagwe a re: "Mma, seatla se, ga se ise se ke se ntitee ka gopê." Mme mmaagwe a tsholola dikeledi, a boloka mafoko ao mo pelong ya gagwe.

A le rona mafoko ao re a tsholele mo pelong, re a akanye, mme le rona re ratane bogolo go go ilana, re tshegofatse bogolo go go itaya.

19. MODIMO WA ME KÊ WA LORATO

1. Modimo wa me kê wa lorato,
Mme oa mpoloka, kê o nthatang,
Kê gona mo ke reng: Modimo wa me
Kê wa lorato, kê o nthatang.

2. Ke ne ke sule losong lwa dibe,
Jesu a rongwa, mme a nntsha teng.
Kê gona mo ke reng: Modimo wa me
Kê wa lorato, kê o nthatang.

3. Jesu Morena, Monamoleli,
A tlosa dibe sefapaanong.
Kê gona mo ke reng: Modimo wa me
Kê wa lorato, kê o nthatang.

4. O nnaya boswa jwa legodimo,
Mme o tlaa nkisa kwa boikhutsong.
Kê gona mo ke reng: Modimo wa me
Kê wa lorato, kê o nthatang.

5. Ke tlaa go baka, Modimo wa me,
Ke tlaa go tlotla bosakhutleng.
Kê gona mo ke reng: Modimo wa me
Kê wa lorato, kê o nthatang.

20. A KE NA LE MANNO KWA LEGODIMONG

Mosadi mongwe o kile a bo a faga pitsa fa isong. Ngwana wa gagwe wa mosetsana yo o nang a bidiwa Mareanyana, a bo a tshameka gaufi le fa teng. Erile mmaagwe a tsenye mo tlung, ngwana a tla, a okomela tse di neng di dirwa, mme a pheola mogopo wa bupe, mme bupe jwa tshologa. Ha mmaagwe a boa, a mo itaya a re: "Tsamaela kwa, nkwanakowe, o nkeme mo tseleng ka gale!"

Morago ga dibeke tse pedi Mareanyana a lwala thata. Erile a le mo mogoteng o mogolo wa bolwetse, a bitsa mmaagwe a re: "Mma, a ko o mpoelle go re, a ke na le manno kwa legodimong? Kana oa itse, mono ke ne ke go eme mo tseleng ka gale, Mareanyana o na a se na manno fa go wena. A le baengele ke tlaa ba ema mo tseleng ka gale?"

Mafoko ao a tllhaba bothoko mo botenye jwa pelo ya ga mmaagwe. A ithaya a re: "Ao, eketse nka bo ke se ka ka bua jalo le ngwana, ha a sa ntse a phela, jaanong o ntlogela ka loso!" Go na le manno a mantsi mo tlung ya ga Rraetsho kwa baengeleng, mme le wena ba tlaa go tshola teng ka kagiso le ka boitumelo."

Mme ngwana a swa mo diatleng tsa ga mmaagwe. Mme mosadi yoo a bakela go bua mafoko a a jalo mo baneng ba gagwe, mme bogolo a ithuta puo e e bonolo ya lorato.

21. MODIMO O BONA NTLHENG TSOTLHE

Ekile yare Jakobe le kgaitsadiê Ana ba le kwa gae ba le nosi, Jakobe a raya Ana a re: "Tlaa, kgaitsadiaka, re ipatlêlê dijô tse di monate mono tlung, re tle re di je, re itumele." Ana a mo fetola a re: "Ha o ka nkisa felong gongwe kwa re ka se kang ra bonwa ke ope, nka ya nao."

Jakobe a re: "Tlaa he le nna, re ye kwa ntlwaneng ya maši, re tsee mogopo wa maši a a themileng, re a je le ka lebebe la ona le le monate." Ana a re: "Re ka bonwa ke monna yole yo o emeng ka kwa segotlong, a fatsa dikgong."

Jakobe a re: "A re ye ka kwa thuding; go na le pitsana ya dinotshe kwa teng, re tlaa ina senkgwe sa rona mo go tsona." Ana a re: "Re ka bonwa ke mosadi yole, ha a okomela ka fenstere e re lebaganyeng le yona."

Jaanong Jakobe a re: "A re ye ka kwa kelereng; ké kwa go sa fitlheng leitlhô la motho teng, gonne go lefifi, mme re tlaa ja diapole tse di monate tse di kwa teng." Ké ha Ana a mo raya a re: "Jakoba, a ruri o gopola go re, kwa teng ga re bonwe ke ope? A ga o itse kaga leitlho le le kwa godimo, le le phunyanyang dipota, le le bonang le mo lefifing?"

Jakobe, yare a utlwa jalo, a tshoga thata, mme a re: "Go jalo ruri, kgaitsadiaaka! Modimo o re bona le kwa leitlho la motho le sa boneng teng. Ké gona, a re se ke ra dira bosula ka gope, le ha e ka ne e le kae. Kea go leboga, ka o nkgakolotse pila."

22. MODIMO O BONA BANA

1. Rara yo o kwale,
Kwa baengeleng,
O bona ka gale
Bana mo lefatsheng.
2. O ba sekegela
Tsebe thapelong;
Mme o ba femela
Mo dithaelong.
3. O ba naya botlhe
Dijo mo tlaleng;
O ba naya tsotlhe
Di tlhokwang mmeleng.
4. Mme oa ba emela
Mo ditsietsing;
O tlaa ba gogela
Gona kwa seding.
5. Rayang bana botlhe,
Ba ba mo fatsheng
Gore ba mo tlotle,
Yo ' ba ratileng.
6. Gape a ba mmatle,
Yo ' ba bolokang;
Ba nne ba mo kgatlhe,
Yo o ba bonang.

23. MOGOLODI LE PHIRI



Erile ka tsatsi lengwe phiri e ntse e ja nku, ya tlhajwa ke lesapo mo mometsong; lesapo leo la batla go e beta. Mo bothokong jwa yona le mo tlalelong ya kua ya re: "Joo, kea swa! Joo, kea betwa! Nthuseng, nthuseng tlhe! Yo o ka ntshang lesapo mo mometsong wa me, ke tlaa mo naya tuelo e kgolo thata."

Mogolodi wa utlwa selo se segolo sa phiri, wa utlwa le kaga tuelo e kgolo ya yona. Ké ha o tla kwa go phiri, wa e raya wa re: "Tlaa, ke go thuse, motho wa batho." Mme wa tsenya molala o moleele wa ona mo leganong la phiri, wa ntsha lesapo.

Erile jaanong mogolodi o kopa tuelo ya ona, phiri ya o raya ya re: "A o sa ntse o batla tuelo? Kana fa o ka bo o nkutlwisitse bothoko ka lesapo, nka bo ke go kgaotse tlhogo. Mme jaanong o ka bo o kae? Ké wêna o tshwanetseng go ntuêla ka ntlha ya go re, o sa ntse o na le tlhogo ya gago."

Ké se se nyatsegang thata, fa motho a sa leboge yo o mo diretseng molemo.

24. BOFEREFERE BO BOLAYA MONG'A JONA

Lebodi le ne le agile fa nokeng, mosima wa lona o le ka fa tlase ga setlhare. Ka tsatsi le lengwe la rata go tshela noka, mme la pallwa, ka e ne e le kgolo thata. La be le ya kwa segwagweng, le kopa thuso mo go sona, ka le itse go re, se nonofile go e tshela.

Mme segwagwa se ne se le boferefere. Sa raya lebodi sa re: "Bofella lekoto la gago mo go la me, mme nna ke tlaa thuma, ke go tshe-disa." Lebodi la dira jalo, ka le sa itse, ha segwagwa e le molotsana.

Erile jaanong di le mo metsing, segwagwa sa re "nwee", sa gogela lebodi kwa tlase ga metsi, gore se le betise. Mme lona la leka ka thata yotlhe go thuma.

Ga bo go tla pekwa, ya bona lebodi mo metsing, ya le thamuletsa, ya le ntsha. Le segwagwa sa tswa, ka di ne di ipofagantse mmogo. Mme pekwa ya di ja ka bobedi jwa tsona.

Ké gona, le wena o itise mo bathong ba bangwe. Lefatshe lotlhe le tletse bosula le boferefere ka go re, motho yo o tsietsang yo mongwe o dira jalo ka go itumella tiro e ya gagwe. Mme ka gale boferefere bo bolaya mong wa jona ka nosi, jaaka go dirafaletse segwagwa.

25. SEGWAGWA



Mo mogobeng go dutse segwagwa, se kaaka'ng,
Mme se opela thata, ké ka kang,
Sa re: Kwaa, kwaa!

Se kaya ha se itse, go seyo ' se phalang.
Ké sona seikgodisi se se belafalang,
Sa re: Kwaa, kwaa!

Matlho ké a maima, le a a phatsimang;
Molomo o mogolo, o o tshwarang menang,
Sa re: Kwaa, kwaa!

Ga go na boikhutso, kwaa, kwaa, yo ' sa feleng;
Ha metsi a megobe a sa ntse a le teng,
Sa re: Kwaa, kwaa!

Ké gôna, molekane, segwagwa selemong
Se opêla fela jalo ka gale mo thabong,
Sa re: Kwaa, kwaa!

26. MPŠA E E MEGAGARU

Mpša ngwe e kile yare e tshotse nama ka molomo, ya re e tshela noka ka yona go e jela kwa moseja.

Ha e fitlha fa metsing, ya okama ka matlho, ya bona setshwantsho sa nama ya yona mo metsing, ya ithaya ya re, ké nama e nngwe gape.

Ké fa e thamuletsa setshwantsho seo sa nama. Mme ka go rialo, nama e e neng e e tshotse ya wela mo metsing, ya tsewa ke noka. Ka moo ya latlhegelwa ke yona, le setshwantsho sa nyelela.

Motho o tshwanetse go itumella se Modimo o se mo neileng. Yo o ratang go ikhumisa ka go sianela dilo tse dintsi, la bofelo o tlaa tlhoka. Batho ba le bantsi ba latlhegelwa ke se se tlhomameng ka ntlha ya go tsoma tse di sa tlhomamang.

27. PHOKOJWE LE PODI

Ekile yare phokojwe a tshwerwe ke lenyora le legolo, a fitlhela metsi mo kगतamping. Yare ka mariba a kगतampi a le magolo, a tshaba go tsena teng. Fa a ntse a batla fa a ka tsenang teng, a thella, a wela mo metsing, a re "thobu". A nna sego, metsi a bo a se boteng; a nwa, a nyorologa. Yare fa a rata go tswa, a pallwa ke mariba a mogolo.

Fa a setse a tlhobogile, ga tlhaga podi, e ya kwa lesung go batla phure. Yare e bona phokojwe mo kगतamping, ya e raya ya re: "Heela, phokojwe, o dirang mo metsing? "Phokojwe a re: "Kea nwa; metsi a, ga se le ka monate! Fa ke re kea tsamaya, ke boela gape ke tle go nwa, ka gonne a monate thata. A ga o bone mpa ya me go re, e setse e le kana kang? Tlaa, o a ikutlwele ka nosi."



Podi ya batho ké fa e tlolela mo teng, ya nwa le yona, mme ya fitlhela a tshwana le a otlhe fêla. Jaanong yare e batla go tswa, le yona ya ratelelwa. Ya raya phokojwe ya re: "O ntsieditse, phokojwe ké wena!"

Phokojwe a e raya a re: "Ke itse maano a re ka tswang ka ona ka bobedi jwa rona." Podi ya re: "A nthute, nka go leboga." Phokojwe a re: "Atamela leriba, gore ke tle ke pagame magetla a gago, ke tswe; etle ere ke dule, ke go tshwarê ka dinaka, ke go ntshe le wena." Podi ya re: "Ké maano a a molemo ruri", ya ba ya dira jalo.

Jaanonng phokojwe a pagama magetla a yona, a tswa, a tsamaya. Podi ya kua ya re: "A o ntlogela moo, etswe o rile, o tlaa nntsha ka dinaka?" Phokojwe a e tshega a re: "Lesilo ké wena! A o ntse o sa itse go re, ké nna phokojwe, mosimane yo o botlhajana? Sala ka moo, o bone kafa o ka tswang ka teng." Mme a tsamaya.

28. DIANE TSA BAGOLOGOLO

1. O se tshege yo o oleng, mareledi a sa le pele.
2. Tselakgopo ga e latse nageng.
3. Montsamaisabosigo ke mo leboga bo sele.
4. Moenyana o pele lebone la wa gabo.
5. Bontsi bo bolaya noga.
6. Bana ba kgwale ba utlwana ka melodi.
7. O se bone thola borethe, teng ga yona goa baba.
8. Sedibana sa pele ga se ikanngwe.
9. Ka tthagolela mookana, ya re o gola wa ntlhaba.

10. Mollo o fisa baori ba ona.
11. Mphe, mphe oa lapisa, motho o kgonwa ke sa gagwe.
12. Nonyane e e mephuphutho megolo e iphatlha ka diphuka tsa yona.

29. GA KEA TSHWANELA GO AKA

Mosimane mongwe o kile a abelwa selepenyana se sennye, gore a tshameke ka sona. Mme a itumela thata ka ntlha ya sona, a rema tsotlhe tse a kopanang natso ka sona. Motlhamongwe o ne a tle a reme tse a sa tshwanelang go di rema ka gope.

Ka letsatsi le lengwe a tsena mo tshimong ya ga rraagwe, a rwele selepenyana mo legetleng, a ithaya a re: "Kajeno ke tlaa nna moremi wa dikgong yo o tlhomameng." Mme a simolola go rema sengwe sa ditlhatshana tsa ga rraagwe tsa diperekisi, ebile e le sa mofuta wa tse di rategang thata.

Erile ka letsatsi la kamoso rraagwe a tla mo tshimong, a bona setlhatshana se sentle sele sa gagwe se letse fa fatshe, se swabile. Mme a hutsafala thata, a ba a tuka bogale a re: "Yo o ntiretseng jalo o tlaa se ntefela bokete ruri."

Mme yo o dirileng jalo o na a itsiwe ke ope, ha e se ena modiri ka nosi. Mme jaanong o na a eme fa

morago ga legora, a utlwa kafa rraagwe a galefileng ka teng, a ba a fetoga mmala ka go tshoga. Mme a akanya a re: "Go thata ruri, rre ke tlaa mo tshabela kae! Ha tiro e nka e didimalêla, ke tlaa be ke le moaki, mme ga kea tshwanela go aka."

Jaanong a sianela kwa go rraagwe mo tshimong, a mo raya a re: "Ntata, ké nna ke remileng setlhatshana seo, ke dirile bosilo ruri." Rraagwe a leba mosimane, sefatlhego sa gagwe legale se sa ntse se tlhoafetse, mme a sa tlhole a galefile.

Mosimanyana yo o na a phela kwa Amerika. Erile a sena go gola, a nna monna yo o ikanyegang le motlhabani yo o bogale. Morago a dirwa Morena, a nna Presidente wa mafatshe a Amerika a a iko-pantseng ka mmusô o le mongwe. Leina la gagwe e ne e le George Washington.

30. SEGOKGO

Modumedi mongwe o kile a tsamaya go etela di-tsala tsa gagwe. Mo tseleng a bonwa ke dinokwane, mme ka di rata go mmolaya, tsa mo tebela. Yare jaanong a bona, ha di tlaa mo tshwara, ka di le lebelo bogolo go ena, a fapogela mo logageng, a iphitlha mo go lona. O na a le mo poifong e kgolo, a eletsa fela go re, di se ke tsa tla go mmatla mo logageng.

Mme jaanong fa mojakong wa logaga ga bo go nntse segokgo. Ga bonala ka pele, ha e le Modimo o o se laoletseng teng go boloka motlhanka wa ona. Gonne erile a sena go tsena, segokgo sa simolla ka bonako go loga bobi mo mojakong wa logaga. Ha dinokwane di fitlha, sa bo se setse se thibile mojako wa logaga ka bobi.

Mongwe wa dinokwane a fapogela kwa logageng go batla mo go lona. Mme erile a leba mojako, a re: "Fano ga a teng, gonne mojako o thibilwe ke bobi." Jaanong dinokwane tsa tswelela go mmatlela kwa pele. Mme monna wa modumedi a gololwa mo tla-lelong e kgolo ya gagwe, a phela.

Ké gona mo seaneng sa batho basweu go tweng: Bobi bo tshwanetse go nna lebota go ena yo Modimo o ratang go mmoloka; mme lebota le tlaa nna bobi go ena yo Modimo o tlositseng seatla sa ona mo go ena.

31. JESU MO LEWATLENG

1. Lewatle la bophelo
Le re le tsamayang,
Le betsa ka dintelo
Tse di ka re tshosang.
2. Morena oa le feta,
Yo ke mo ikantseng;
Ga le kake la mpeta,
Ha a na le nna teng.



3. Jaaka mo motlheng ole
Wa Jesu mo fatsheng,
Mokoronyana ole
O tsenye tsietsing.

4. Dintelo tsa o betsa,
Tsa gwaša mo phefong,
Tsa batla go nyeletsa
Barutwa mokorong.

5. Jesu o teng le ena,
O letse thobalong,
Ba bitsa: "Yoo, Morena,
Re thuse tlalelong!"

6. Mme Jesu foo a tsoga,
A re: "Lo boifelang?
Ga lo na go lemoga,
Ha ke le yo ' busang?"

7. Ka foko lengwe fela
Le a le buileng,
Lewatle la boela
La nna ka fa mokgweng.

8. Jaanong ka metlha yotlhe,
Ha re le tlalelong,
Re ka tshabela rotlhe
Go Jesu thapelong.

32. TLOTLA RRAAGO LE MMAAGO

Monnamogolo mongwe ekile yare a setse a tsofetse thata, a ya go khubama kwa baneng ba gagwe. O na a sa tlhole a na le go tsamaya, le ditsebe di thibetse, a sa tlhole a utlwa pila. Fela, bana bao ba ne ba sa mo tshola ka mokgwa o o tshwanetseng bana go tshola rraabo.

Ka diatla tsa gagwe di ne di tetesela ka botsofe, ha a ja, dijo fa gongwe di tshologe. Ka ntlha ya moo ba mo nnisa kwa thoko mo sekhutlong, gore a se tlhole a ja nabo fa tafoleng. Sejana se ba mo tsholelang dijo mo go sona e ne e le se sennyane, se se nyatsegang. Tsatsi le lengwe ka a pallwa ke go se tshwara pila, sa wela fa fatshe, sa thubega.

Jaanong ngwetsi wa gagwe a mo tlalela bogale, a mo omanya thata. Monnamogolo a didimala, mme a se ka a mo fetola; fela o na a sudile pelo ka ntlha ya puo e e bogale ya ngwetsi wa gagwe. Ngwetsi a mo neela mogojana wa legong, gore a jele mo go ona.

Mosadi yo, o na a na le ngwana wa mosimane wa nyaga tse tlhano. Ka letsatsi le lengwe mosimanyana yoo a tsaya logong, a batla thipa, mme a simolla go betlabetla logong loo. Rraagwe a mmona, a mmotsa a re: "O betlang ne, ngwanaka?" Mosimanyana a araba a re: "Ke betla mogojana o etlaareng ntate le mme ba tsofetse, ba jelang mo go ona."

Yare monna le mosadi ba utlwa puo eo ya ngwana wa bona, ba tlhajwa ke ditlhong, ba inyatsa, ba ya kwa go rraabo, ba re: "Rra, re sentse, re itshwarele!" Ba mo ntsha mo sekhutlong ba re: "Tlaa, o nne le rona, o se tlhole o ja o le nosi koo. Latlha mogojana oo, o jele mo sejaneng se seša se."

Go tloga ka tsatsi leo monnamogolo ba mo tshola sentle, ba mo oka kafa go tshwane-tseng ka teng, ba mo direla ka mokgwa o o tshwanetseng bana go direla bagolo ka ona.

33. MANTSIBOA

Letsatsi lea phirima, le tikela ka dithaba. Mahube a setse a bonala. Marunyana a a mo leaping a simolla go hibila le ona, a hibitswa ke marang a letsatsi le le wetseng. A bontle jo bo gakgamatsang, ha o bo ela tlhoko! Bo re lemotsha go sennyana kgalalelo ya Modimo, mmopi wa dilo tsotlhe le wa bontle jo.

Batho ba boa kwa masimong. Ba tswa go tthagola. Ba rwele dipetlwana le megojana le medutwana. Ba bangwe, le ha ba lapile, baa opela. Ba itumela, ka ba weditse tema e kgolo, mme jaanong ba ya go lapologa bosigo.

Banyana ba tswa nokeng. Megojana ba e tlatswitse. Mollo oa tuka, pitsana e tthatlegilwe. Basimane ba gorositse dikgomo. Ba tsere dikgamelo, ba ile go gama. Dinku le dipodi di mo sakaneng. Modisa wa tsona o naya dikwanyana bommaatso. Dikgogo di pagame dithare, di ile go robala. Dinonyane le tsona di ile go robala kwa dikgweng.

Bosigo bo tsenye. Ngwedi e tllhabile. Dijo tsa maitsiboa di jelwe. Batho ba bagolo ba sa ntse ba itisitse ka dikgang. Bana ba sa le kwa mananeng, baa tshameka. Kwa kgakala go utlwala phokojwe; gone bosigo dibatana dia be di dule mo mesimeng.

Jaanong go iwa go robalwa. Badumedi ba ineela thapelong. Ba baka Modimo o o ba disitseng mo letsatsing le le fetileng, wa ba wa ba thusa mo ditirong tsa bone. Ba kopa boitshwarelo jwa dibe ka Jesu Krisete, Moreboloki. Ba rapela go re, o ba


dise mo bosigong, fa ba robetse, gore ba se tlelwe ke kotsi epe. Ba ineela mo atleng tsa Modimo, gore mmaba yo o bosula, ebong Satane, a se ka a bona go ka ba direla bosula bope.

Go robetswe jaanong. Batho le dikgomo le dipologolo le dinonyane, tsotlhe tsotlhe di robetse. Go didimetse, go rile "tuu". Yo o sa robaleng, le e seng go otsela, ké Modimo. O disitse ntlheng tsotlhe, o disitse le rona, jaaka go bakwa mo Pesalemeng ya bo 121. A molemo o mogolo wa Modimo!

34. SEFELA SA MANTSIBOA

- | | |
|--|--|
| 1. Tsatsi ha le wela
Ké le lentle jang!
Ké ka thabo fela
Re ka le lebang. | 4. Tsatsi mme le ile,
Re mo bosigong,
Fela re thabile,
Rara o tisong. |
| 2. Tshipi di a bitsa
Mo dituriong
Go le felegetsa
Le yang thobalong. | 5. Ene ga 'tikele
Jaaka tsatsi le;
Ene ga 'otsele,
O mo tisong e. |
| 3. Mme go tsholeditswe
Diatla thapelong;
Mme go lebisitswe
Pelo Modimong. | 6. Rara, re romele
Sedi mo pelong,
A le re gogele
Kwa go wena, Mong. |

35. DIPODI TSA GO SE UTLWANE



Podi e kile ya re e fula fa dintshing tsa noka e e boteng, ya rata go tshelela kwa moseja. Ya fitlhela go le moratho wa go tshela. Yare e setse e le fa gare ga moratho, ya kgatlhana le podi e nngwe, e e reng e tshelela moseja o mongwe.

Mme yare ka go se e e ka fetang ka e nngwe ka ntlha ya bosesane jwa moratho, ya ntlha ya re: "Podi ké wena! Boa ka morago, gore go tshele nna pele!" Yona ya re: "Le go ka! A go boe wena." Ele ya re: "O mang ne, selo ké wena! A oa ntaola? Ka re, boa ka morago! Ha o sa utlwe, ke tlaa go supetsa se ke leng sona."

E nngwe ya re: "Ehe, o bua jaana? Tlaa he, re bone go re, a o ka mpusetša kwa morago! A moratho ké wa gago? Fa o sa ntshutele jaanong-jaanong, o tlaa bona se ke tlaa se dirang." Mme ka go rialo ya be e setse e tlolela e nngwe, e re e e digela mo bodibeng. Le ele ya tuka bogale, ya e phurumela. Ga nna ntwa e thata, tša kitlana, tša thulana ka ditlhogo, tša tšhabana ka dinaka. Go fela ga ntwa, tša wela mo bodibeng ka bobedi jwa tsona, noka ya di tsaya.

Bogale bo tšhwana le mollo o o fisang. Seane sea re: "Mollo o fisa baori ba ona."

36. PHOKOJWE LE PHAGE

Phokojwe o kile a kopana le monnaawe ebong phagê, mo nageng, ba dumedisanya. Yare ba botsi-sanya maphelo, phage a re: "Nna ga ke phele sentle. Motsana o o fa thabeng ole o na le mpša e e bogale, e kile ya batla go ntšhwara. Jaanong yare fa ke e gopotse, ga ke iketle sentle, ke tšhogo thata." Phokojwe a re: "Nna, dimpša ga ke di kae sepe; gonne fa di ka tla go ntšoma, ke na le maano a mantši a go di sia, gore di se ntšhwara. Ke na le maano a a fetang kakanyo ya gago thata." Phage a re: "Mme nna, ke le selonyana sa batho, ke na le maano a le mangwe fela, fa nka se ka ka di sia ka ona, ke tlaa be ke latlhegile." Phokojwe a re: "A ngwana wa batho, ke go utlwela botlhoko ruri."

Jaanong ga bo go utlwala lenaka la batsomi, dimpša di tla di sianye, di ntse di bogola. Phokojwe

a re: "Thethee thee", a re ke leka maano a, a re ke leka ale, ga se ka ga mo thusa sepe, la bofelo dimpša tsa mo tshwara. Phage ene a pagama setlhare, ka e le ona maano a gagwe, mme a palla dimpša, a phologa. Phage a bo a ithaya a re: "Jaanong kea lemoga go re, maano a le mangwe a a molemo a phala a mantsi a a seng molemo."

Thuto: Ha o ithuta tiro, ithute e le nngwe fela ka tlhomamo, gore o tle o e itse, e go phedise. O se ka wa leka tse dintsi, gonne o ka se ke wa itse epe ya tsona pila, mme jalo o ka latlhega.

37. MOSIMANE LE PODI

Go kile ga bo go le mosimane mongwe, yo go ja a neng a go rata thata, mme go ithuta gona a sa go rate; a rata go tlhola a tshameka fela, mme go ya sekolong go sa mo natefele ka gope. Ké gona ka moo batho ba mo teileng leina ba re: "Motlapa."

Leina leo o na a sa le rate ka gope, le ne le mo tena. Ka moo a ithaya a re: "Ke rata go bontsha batho go re, ga ke motlapa, le go re, le nna ke tlhoafetse go ithuta." Ka go rialo a tsaya buka ya gagwe ya Mopele, a ya ka yona kwa tseleng e e tswang ka motse wa gabo, a fitlha a nna mo koteng e e letseng fa tlase ga setlhare se segolo fa tseleng.

Batho ba motse ba ne ba tshwanetse go feta teng ba botlhe, ha ba ya ditirong tsa bona. Jaanong a bula buka, a okomela mo go yona. Ga aa lemoga, ha e menogile, legodimo la yona le ile kwa tlase,



ditlhaka di eme ka ditlhogo. Le ha go ntse jalo a tloafala go okomela mo bukeng, maoto a ntse a kgadikana. Ga feta sebakanyana, a tshwarwa ke boroko, a otsela. Tlhogo ya ribela, a e tsosa, ya ribela, a e tsosa

Ha a ntse a tlabana le boroko jalo, ga tlhaga podi, kgagapa e e ditedu, e tiro ya tlhogo e e itseng thata. Yare e bona tlhogo ya mosimane e ribela gape, ya re: "Ehe, o raya nna? Oa re o ka lwa le nna? A re bone gee!" Ké ha le yona e inamisa tlhogo, e kata ka morago. Ya mosimane ya re "ribe", podi ya re: "Ke na nao", ya tlolela mosimane, ya mo kata phatla ka tlhogo. Mosimane a wela kwa, buka ya wela kwa.

Mosimane ké ha a sela buka ya gagwe, a ya gae a lla. Le ha ka mo teng tlhogo go ne go sa tsena tlhaka epe, mo phatleng gona lebadi le ne le bonala. Podi ya mo leba, e gakgametse ha ntwá e fedile ka

pele jaana, mme ya ema fa tseleng, e letile, ha go ka tla mosimane yo mongwe gape yo o sa ithutang, le yo o ka tshwarwang ke boroko fa tseleng.

Basimane, ere botlapa bo lo fenya, lo gopole podi.

38. TLHOAFALO E MOLEMO

1. Ngwanyana o ne a ntse teng

Go ithuta ka dibuka,

Ga okomela fenstereng

Letsatsi ha le tuka.

La mmita la re: "Tloga foo,

Tlaa, re tshameke, a r'ye koo!

Re tlaa ya kwale mo nageng,

Re itumela dithunyeng."

Ngwanyana mme a ithuta,

A gana go ka khutla,

A raya tsatsi lele:

"Nna ke tlaa fetsa pele."

2. Ngwanyana o ne a ntse teng,

Go ithuta tsa go bala.

Ga okomela fenstereng

Nonyane e ' mebala,

Ya mmita ya re: "Tloga foo,

Tlaa, re tshameke, a r'ye koo!

Re tlaa ya kwale mo nageng,

Re ja maungo ditlhareng."

Ngwanyana mme a ithuta,

A gana go ka khutla,

A raa nonyane ele:

"Nna ke tlaa fetsa pele."

3. Ngwanyana yoo a fetsa teng
 Go buisa le go bala.
 Jaanong a rongwa mo lapeng
 Go tlhatswa le go fala,
 Ga tla go ene ka mo gae
 Ngwana yo mongwe, a nna nae,
 Mme a mo raya thaelong:
 "Tlaa le nna, re ye tshamekong!"
 Ngwanyana mme a gana,
 A tlhatswa megopyana,
 A bua foko lele:
 "Nna ke tlaa fetsa pele."

39. LEGOTLO LA GO LEBOGA TAU

Tau, kgosi ya diphologolo, e kile ya bo e thulametse, e robetse. Yare magotlo a tshameka tikologong ya yona, le lengwe la e pagama, la ba la tla go fologa ka nko ya yona. Le ne le sa lemoge go re, ké molato o mogolo, ha motho a ka gata morena yo o kana ka tau.

Ké ha tau e thanya mo borokong, e tshwara legotlo ka letshoo la yona e re: "Selotowe, o ntshwenya ke robetse! Kea go bolaya." Legotlo la fitlhela le setse le le mo dinaleng tse di botlhoko tsa tau, la lla la re. "Tswii, tswii! Intshwarele, morena tau, intshwarele, kea go rapela, ke tlaa go leboga."

Tau erile e utlwa sello seo sa legotlo, ya tshoga ya re: "O ka be o ka nteboga ka eng, o le selonyana fela, se le tsie se sa e feteng?" Legotlo la re: "Ga ke

itse, mme fela nka se ka ka lebala go leboga.” Tau ya le lesa, mme lona la tloga ka lebelo, le itumetse thata.

Ga feta malatsinyana. Yare tau e tsoma, ya bona e setse e tshwerwe ke lotloa lo lo logilweng ka dithapo tse di thata, lo theilwe ke batsomi. Ya pharathanya, e re e kgaola lotloa, ya fitlhela go le thata. Ya lwa le lona ka meno le ka dinala, ya tloboga, ya ba ya re: “Kajeno he ba mphentse, ke sule.”



Jaanong ya opa mokgosi, ya bopa ka bogale jo bogolo. Diphologolo tse di gaufi tsa tshaba. Batsomi ba e utlwa mo gare ga bosigo, ba re: “Ea aka, re e tshwere, re tlaa ya go e bolaya bo sele.” Tau ha e lemoga go re, sa yona ké go swa loso lo lo botlhoko la marumo a batsomi, e sa kgone go itlwela, ya ineela.

Erile go didimetse, go rile "tuu", ya utlwa kwa morago ga yona mo tlhageng go re "swaratlhaswaratlha, swaratlha". Ya utlwa legotlo le re: "Ts, ts, ts" ha le fitlha. La re: "Baa pelo, morena tau, kajeno o tlaa bona kafa ke go lebogang ka teng." La ba la simolla go ngena dithapo tsa lotloa ka meno a a bogale a lona, la di kgaola tse tsothhe. Tau ya bofologa, ya tsoga, ya itshidila maoto a a neng a sule bogatsu. Yare fa e boela kwa dithabeng, ya utlwa legotlo le re: "Ts, ts, ts, legotlwana le lebo-gile tau."

Tebogo ka metlha ké e e kगतलhang;
Go tlhoka tebogo go nyatsega jang!

40. TSA BOGOLOGOLO

Metlheng ya bogologolo, ha makgoa e le gona a fitlhang mo lefatsheng leno, a bo a tshajwa thata ke bana ba batho batsho. Ha ekare bana ba tshameka fa motseng, lekgoa la re "roto" ka pitse, le lebile motse, go utlwale mokgosi o o reng: "Lekgoa!" Bana ba re "timetime", ba ganele mo matlung, fela jaaka dikgogwana di tshaba segootsane.

Motlhamongwe e ne ya tle e re lekgoa le tsamaya ka tsela, le fitlhele basimane ba disitse, gongwe ba tshameka fa tseleng. Ha jaanong ba le bona, ba tshaba, le ba tebele ka pitse le re: A ke bone, ha basimane ba ka e sia. Lekgoa e be e le go tshameka, ha le rialo, mme basimane bona ba tshogile, ba re le rata go ba tshwara le go ba tsaya. Ka moo makgoa ba a boifa thata.

Ka tsatsi le lengwe basimane ba babedi ba be ba disitse dikgomo kwa nageng. E ne e le naga e e dikgwa. Yo mongwe leina la gagwe e ne e le Karele, yo mongwe e le Jakobe. Erile Jakobe a tswa go tlhola dikgomo, a re ke boela kwa go Karele, a mmona a setse a le kgakala, a tshaba.

Ké ha le ene a tshoga, a sala Karele morago, a lekile ka lebelo lotlhe la gagwe. Ha a mo atamela, yole a re "thee", a tshabele kwa gongwe. Ha a mo atamela gape, a re "thee", a lekele ntlha e nngwe gape. Jaanong Jakobe a tsholetsa lentswe, a kua a re: "Naare o tshabang, a o tshaba nna?" Yole a re: "Se tle kwano, tshabela kwa! A o rata ra tshwarwa ka bobedi?"

La bofelo ba fellwa, ba ema. Jakobe a re: "O tshabang ne, o mpolaisitse lebelo jaana?" Yole a re: "Ke ne ke tshaba lekgoa; a ga oa le bona wena?" Jakobe a re: "Fa kae?" Yole a re: "Ke le bonye le tlhagella ka sekhu se segolo sele." Jakobe a re: "A oa re o na o sa tshabe selo fela, o sa se bona pila; tlang nna ga kea bona sepe?" Yole a re: "Nyaa, ka re, tota tota ruri e ne e le lekgoa." Jakobe a re: "A re ke re ye go batla go re, o ka bo o tshositswe ke eng?"

Yare ba fitlha fa ba neng ba ntse teng, ba bona kutu ya setlhare e tlhageletse ka sekhu, dikala di kgaogile, makwati a tlogile. Karele a re: "Kuii, bona tlhe! A kota ya go mpolaisa lebelo! Erile ke tsosa matlho, ka e bona bosweuyana bo, ka re lekgoa, ka be ke ragoga, ke tshaba." Jaanong letshogo la bona la fetoga setshego se segolo.

41. BANYANA, RATANANG

Johannese, morutwana wa ga Jesu, Morena, le moapostolo wa gagwe, o ne a tsofala thata. Mme erile a tsofetse, a le bokoa, a bo a palelwa ke go tsa-maya. Le kwa phuthegong o ne a sa tlhole a ya. Mme bakrisete ba ne ba sa rate go mo tlhoka mo phuthegong ya bona.

Ka moo makau a badumedi, e ne ya re go iwa phuthegong, a mme mo setulong, a mo rwale ka sona, go mo isa kwa ntlong e bakrisete ba phuthetseng mo go yona go utlwa lefoko la Modimo le go rapela. O ne a setse a ketefalelwa ke go bua. Ké gona e neng yare, ha ba mo kopa go re, a ba bolelle lefoko la Modimo, a nna a bua le le lengwe fela a re: "Banyana ba me, ratanang!"

Erile ba mmotsa go re, ké ka ntlha ya eng, ha a ba kaela ka gale ka lefoko lengwe leo fela, a ba raya a re: "Ké taolo ya Morena, mme ditaolo tsothle tse dingwe di kopantswe mo taolong e. Ha lo utlwa yona, lo e diragatsa, le tsothle tse dingwe lo tlaa bo lo di diragatsa."

42. MONNA MO NGWEDING

Mo metlheng ya bogologolo monna mongwe o kile a ya go rwala dikgong kwa sekgweng, e le ka tsatsi la Sondaga. A fitlha a rema ngata e kgolo ya dikgong, a e bofaganya, a e somela thobane ya gagwe, a e sikara, a e isa gae.

Mo tseleng a kopana le monna yo montle, yo o apereng diaparo tsa Sondaga, gonne o na a ya kwa kerekeng. Monna yoo a emisa morwadi wa dikgong, a mmuisa a re: "A ga o itse, ha e le Sondaga kajeno, letsatsi le Modimo o no wa ikhutsa ka lona, o sena go bopa lefatshe, le diphologolo tsotlhe, le motho? A ga o itse go re, go kwadilwe mo molaong go twe: Gopola letsatsi la Morena go le itshepisa?"

Mmotsi yoo e ne e le Modimo ka osi, o le mo tshwanong ya motho. Mme morwadi wa dikgong o ne a ithatafaditse pelo, ké gona ka moo a arabileng a re: "Sondaga mo lefatsheng gongwe Mandag kwa legodimong, seo ké eng go nna, gongwe ké eng go wena!"

Jaanong Modimo wa mo raya wa re: "O tlaa rwala ngata ya gago ya dikgong ka bosakhutleng. Mme ka Sondaga mo lefatsheng o sa mo kae sepe, o tlaa baana le Mandaga yo o sa khutleng ga jaana. O tlaa ema mo ngwedding ka ngata eo ya dikgong go nna sesupo sa kaelo go botlhe ba ba itshepololang letsatsi la Sondaga ka ditiro!"

Go simologa ka motlha oo go eme monna ka gale mo ngwedding ka ngata ya dikgong, mme ka gongwe o tlaa ema foo go ya bosakhutleng.

43. KOPELO YA BOSIGO

1. Ke lapile, ke ya teng
Go robala diphateng;
Rara kwa legodimong,
A ko ' ntise bosigong.

2. Tse ke di go leofetseng,
Di nteballe mo Kristeng;
Boitshwarelo jwa ' go, Mong,
Bo nkgolole melatong.
3. Tsala tsa me mo motseng,
Batho botlhe lefatsheng,
Ba femele tlalelong.
Tse di ka tlang bosigong.
4. Botlhe ba ba bobolang,
Le ba ba hutsafalang,
Ba fodise matlhokong,
Ba gomotse dipelong.
5. Ngwedi wa ' go leaping,
O o bonesang ' fifing,
A o re gopotse, Mong,
Tiso ya 'go bosigong.

44. MONNAMOGOLO WA KHUMANEGO

Go kile ga tla monnamogolo wa khumanego fa kgorong kwa gaetsho. O ne a tsofetse, a otile, a setlhafetse, tlhogo ya gagwe e thuntse, moriri o le mosweu, diaparo le kuane di setse di onetse thata.

Yare Mmangwane a mmona, a nthaya a re: "Ya kwa go monnamogolo yole, o mo fe dijo, ekete o bolailwe ke tlala." Ka tsena mo tlung, ka mmatlela bogobe le nama, ka di mo naya. A di tsaya, a nteboga ka go inamisa tlhogo, mme a se ka a bua lefoko lepe. Yare ke mo leba mo matlhong, ka bona a tletse dikeledi.

Erile ka letsatsi lengwe, ke le nosi mo mmileng, ga feta mpša e kgolo fa go nna, mme yare e mpona, ya tla kwa go nna ka bogale, e bogola, e rata go

ntoma. Monnamogolo yole a bo a le gaufi, mme yare a mpona ke le mo tlalelong, a tla ka bonako, a tshotse patla ya gagwe, a e koba, a ba a nthaya a re: "Ngwanaaka, molemo o tshwanetswe ke molemo o mongwe. Erile ke bolailwe ke tlala, wa nkutlwela botlhoko; mme jaanong kea itumela, ka ke bonye go ka go thusa."

45. KODU LE DIKODUNYANA

Karolo I.

Banyana ba babedi ba kile ba rongwa ke mmabo go tswa mo motseng go ya kwa gabo malome wa bone. E ne e le mosetsanyana wa dinyaga di le lesome, le mosimanyana wa dinyaga di le nne.

Tsela e ne e se e e ka timetsang motho. E ne e tswa fa tlung ya gabo, e ralala motlhabana wa mafulo a majang a matala, e rapalla fa thoko ga sekgwa go fitlha kwa letsibogong la nokana. Mme fa motho a le fa nokaneng, o ne a setse a bona ntlo ya malome wa bone le masimo a gagwe. Gape boleele jwa tsela e ne e le jwa nako e le ngwe fela, ebile bana bao, e ne e se la ntlha go tsamaya ka tsela e.

Mmaabo o ne a ba laela thata go re, ba tsamaye fa thoko ga sekgwa, eseng go tsena mo go sona, gore ba se timele. Yare ba sena go tswela kwa ntle, ba ne ba setse ba lebetse kodu ya ga mmabo, mme ga utlwala dikodunyana tse dingwe di le dintsi. Serurubele sa fofafofa mo setlhatshaneng fa thoko ga tsela, sa raya mosimane sa re: "Tlaa, o ntshware!" Sešešenyana sa raya mosetsana sa re: "Tlaa, o nkgetle!" Sa ba sa re: "Mo teng ga sekgwa go na le meretlwa le mešabele e mentsi. Le gona ditlhare di tletse boreku."

Bana ba tsenela mo teng ga sekgwa. Teng ba bona kgabo mo dikaleng tsa ditlhare, ya ba raya ya re: "Tlang, lo bone botlhale le bofefe jwa me!" Ya

tlolela kwa le kwa, ya tswa setlhareng se, ya tlola mo go sele, ya pagama go fitlha kwa godimodimo. Dithare tsa sekgwa tsa ba laletsa tsa re: "Tlase ga moriti wa rona go monate bogolo go mo mogoteng wa letsatsi la tsela e e kwa thoko ga sekgwa."

Jaanong banyana ba lebala kodu e nngwe, mme ba latela dikodunyana tse dintsi, ba timelelwa ke tsela. Mme yare ba akanya go e batla, ya bo e setse sekgwa se kgotlhaganye bogolo, letsatsi le phirimile, bosigo bo fitlhile, lefifi le ntshofaditse tikologo yotlhe ya bona.

Karolo II.

Erile jaanong bosigo bo ba wela ka poitshego ya jona, le sekgwa se ba dikaganyeditse ka tidimalo e kgolo, mosetsana a tshoga thata, bogolo ka a ipona molato, le ka a bona kgaitsadie a lapile, a sa tlhole a na le go tsamaya, le ha e le kgato e le nngwe fela. Yare a bona a wela fa fatshe, a gopola go re, oa swa.

Mo tlalelong e kgolo ya gagwe a gopola lefoko la Pesalema ya bo 23, le le reng: "Le ha ke tsamaya mo mogorogorong wa moriti wa loso, ga nkitla ke boifa bosula bope, gonne ò na le nna, tsamma ya gago le seikokotlelo sa gago dia nkgomotsa."

Mo poifong ya gagwe a bolella mosimanyana mafoko ao mo tsebeng ya gagwe, a ntse a a boaboella gangwe le gape a re: "Le ha ke tsamaya mo mogorogorong wa moruti wa loso; le ha ke tsamaya mo mogorogorong wa moriti wa loso; le ha ke tsamaya mo mogorogorong wa moriti wa loso." Go bua ga fetoga go bitsa, go bitsa ga fetoga go kua, mme ga utlwalela kgakala mo sekgweng.

Motlhanka wa malome wa bona a feta fa sekgweng go setse go le lefifi; mme a utlwa mafoko ao a letshogo, a lata kodu ya ona, a fitlhela banyana, a ba tsaya, a ba isa kwa tlung ya morena wa gagwe.

Banyana bao ba ne ba ithutile ditemogo di le tharo. La ntlha ba lemogile go re, go molemo go utlwa kodu e le nngwe ya mmabona bogolo go go utlwa dikodunyana tse dintsi tsa mefutafuta. La bobedi ba lemogile go re, go molemo go gakologelwa kodu ya Rraetsho wa legodimo motlhang kodu ya mmamotho e lebetsweng. La boraro ba lemogile go re, Rraetsho wa boikanyo o re utlwa le mo bogareng jwa sekgwa le jwa bosigo, mme o re thusa ka diatla tsa barongwi ba gagwe.

46. DINOKWANE TSE THARO

Dinokwane tse tharo di kile tsa bolaya monna wa mmapadi, a tsamaya ka koloi ya gagwe mo sekgweng, a rwele dithoto tse a di bapatsang. Ebile o ne a tshotse madi a mantsi, a o a bonyeng ka dilo tse o setseng a di rekisitse. Yare di sena go mmo-laya, tsa tsaya thoto yotlhe, tsa e isa kwa logageng lwa tsona.

Banna bao erile ba bolokile tsotlhe, le madi ba a badile, mme ba le mo boitumelong jo bogolo ka ntlha ya lohumo lo ba lo bonyeng, ba roma yo monnyane wa bona go re, a ye go ba rekela dijo mo motseng wa bathobasweu, o o neng o se kgakala le felo ga bona.

Yoo a tsamaya. Ha a ile, ba sala ba loga maano, ba raana ba re: "Go ka re thusa'ng, ha thoto e re e abalana le mosimane yo? A bogolo re mmolae, ha a boya, gore e tle e nne ya rona."

Mosimane ha a le mo tseleng, a tlelwa ke megopolo e e ntseng jalo le ena, a ithaya a re: "E ka nna letlhogonolo le legolo, ha lohumo lotlhe lo e ka nna lwa me. Banna bale a ke ba bolae ka setlhare, ke se tshetse mo dijong, gore ke sale ka lona ke le nosi."

Mme a dira jaaka a akantse, a reka dijo, a ba a reka le more o o bolayang, a o tshela mo dijong, a boela kwa go bona kwa logageng.

Erile a goroga, banna ba babedi bale ba wela mo go ena ka marumo, ba mmolaya. Jaanong ba tsaya dijo tse a di rekileng, ba nna fa fatshe ba di ja, ba sa lemoge go re, di tshetswe setlhare. Dijo tsa ba bolaya ka bobedi jwa bona, ba swa ka bothhoko jo bogolo. Lohumo lwa se ka lwa ruiwa ke ope wa bona, ka gonne ba sule ba bothle.

47. TIRO YA MISIONE

ké go re:

Ya go isa Efangele mo ditšhabeng.

Morena o kile a raya barutwa ba gagwe a re: "Eang, lo rute merafe yotlhe, lo e kolobetse mo ineng la Rara le la Morwa le la Moya o o Boitshepo, lo e rute go boloka tsotlhe tse ke di lo laoletse." Go tloga ka letsatsi leo baruti ba ntse ba tsamaya le mafatshe, ba isa Efangele ya ga Jesu, Mmoloki wa batho, kwa ditšhabeng tsotlhe. Le kajeno ba sa ntse ba dira jalo.

Mme le diphuthego di thusa mo tirong e ka dineo, gore go rongwe baruti ka tsona. Le bana ba tshwanetse go thusa mo tirong e ka dineo kafa ba ka kgonang ka teng. Ka ngwaga le ngwaga go dirwa moletlo wa Misione, gore batho ba leboge Modimo o o ba ntshitseng mo lefifing la boheitene, ba ntshe dineo tsa bone, gore go rongwe baruti kwa ditšhabeng tse di mo lefifing.

Ekile yare moletlo wa Misione o itsisitswe, bana ba babedi ba ya kwa bagolong ba bona ba re: "Go tsoga go iwa moletlong, mme ga re na dineo." Rraabo a ntsha seako sa mabele mo koloing, a tswa masimong ka yona, a se ba naya, a re: "Neo ya lona ké e." Mmaabo ena a ba thusa ka matiki.

Kwa moletlong ba itsitse matiki fela. Seako sa mabele ba se boloka. Yare selemo se fitlha, ba kopa tshimonyana mo go mmaabo, ba photha seako sele,

ba jwala mabele mo go yona. Mabele a mela, a gola, a ntsha diako. Yare a budule ba a kotula ka nosi, ba be ba a photha, mme a tswa kgamelo e tletse mabele. Le ona ba a boloka.

Ka selemo se sengwe ba fiwa tshimo e kgolwane, ba jwala mabele a otlhe. A mela pila gape, a ba a butswa. Ya nna tiro e kgolo mo go bona go a kotula le go a photha. Ha e kabo mmaabo a sa ba thusa, ka gongwe ba kabo ba sa kgona go e fetsa. Mabele ao a tladitse dikgetse. Rraabo a a rwala ka koloi, a ya go a rekisa, a tlhaga a tshotse diponto tse di ka nnang bone gongwe go fetisa. A di ba naya a re: "Neo ya lona ké e."

Bana ba itumela thata, ka ba bona madi a a kana-kana, a tswa mo seakong se le sengwe fela ka maano a a molemo a bona. Ba a naya otlhe go re, ba thuse go isa Efangele ka ona mo ditšhabeng, gonne ba ne ba rata puso ya Modimo. Ka madi ao go rekilwe tshipi e e biletsang batho kerekeng, le bana sekolong, gore ba utlwe kaga Jesu yo o ba ratileng, le yo o ba rekolotseng mo losong ka madi a a boitshepo a gagwe.

Bana ba ba ratang Modimo ka pelo yotlhe ba se ka ba tlhoka maano a go bona se ba ka thusang ka sona mo tirong ya Modimo. Mme Modimo ona o rata monei wa boitumelo, oa mo tshegofatsa.

48. BANYANA MO BAHEITENENG

1. Banyana mo baheiteneng —
Ao, go botlhoko jang! —
Ga ba na kitso mo moeng
Ga yo o ba ratang.
2. Ba obamela tempeleng
Medimo poifong,
Medimo e e setilweng
Ka tshipi le logong.

3. Medimo e ba e tlotlang,
Ké e e sa pheleng;
Ga e na thata e ' thusang
Losong le malwetseng.
4. Ha ba ka swela mo fifing,
Ba sa itse Jesu, Mong,
Ga ba nke ba ya leseding,
Ba tlaa ya tatlhegong.
5. Mme lona ba lo phuthegong,
Lo tlhoganolo jang!
Lo na le Rara godimong,
Ké yo o lo ratang.
6. Lo ka mo kopa mo ineng
La Jesu Kriste, Mong;
O tlaa lo utlwa, yo ' rileng:
Lo mpitse tlalelong.
7. Le tsothle tse lo di tlhokang
Mono mo lefatsheng,
Ké Rara yo o di lo fang,
Ba o lo ratileng.
8. Mme ha lo kgaoga bonyaneng
Jwa lona mo losong,
Lo itse, ha lo tsena teng
Go Jesu godimong.
9. Ké gona ke lo kaelang:
Banyana phuthegong,
Batlang yo ' lo itshwarelang
Melato bophelong.
10. Banyana ba ba rategang,
Ba lo leng mo seding,
Lo se lebale, rapellang
Ba ba sa leng fifing.

49. DITSHIKA LE DITSALA

Monna yo o tsetseng rre gongwe mme ké rremogolo. Mosadi yo o tsetseng rre gongwe mme ké mmemogolo gongwe nkoko. Mogoloa rre le ene ke mmita rremogolo. Gape, mogoloa mme le ene ke mmita mmemogolo. Nkoko o mpitsa ngwanagwanaake.

Monnaa rre ke mmita rrangwane. Bokgaitadia rre ké borragadi. Kgaitadia mme ké malome, monnaa mme ké mmangwane.

Ngwana wa ga rrakgadi le wa ga malome ke ba bita bontsalake. Nna rrakgadi le malome ba mpitsa setlogolo.

Ngwana wa ga rre wa mosimane yo o tsetsweng pele ga me, ké nkgonne; yo o tlang morago ga me ké nnake. Bana ba ga rre ba basetsana botlhe ké bokgaitadiake. Bana ba mogoloa rre le ba mogoloa mme le bone ke ba bita bonkgonne.

Kwa ga etsho ké kwa go tsetsweng rre. Kwa ga etshomogolo ké kwa go tswang mme. Ba ga etsho ké batho ba botlhe kwa go tsetsweng rre. Ba ga etshomogolo ké batho ba botlhe kwa go tswang mme.

Monna yo o nyetseng kgaitadiake, gongwe monna yo ke nyetseng kgaitadie, ke mmita

mogwe. Mosadi wa ga nkgonne gongwe wa ga nnake, mosadi wa me o tlaa mmitisa molangwe. Monna yo o nyetseng mogoloa mosadi wa me, le nna ke mmitisa molangwe. Mosadi wa me o bitsa bokgaitsadiake bomogadibo, le bone bokgaitsadiake ba bitsa mosadi wa me mogadibo.

Bagolo ba mosadi ba me ke ba bitsa bago-gwadi ba me. Bone ba mpitsa mokgwanyane gongwe mogwe. Fa mosadi wa me a bua kaga rre gongwe mme, o ba bitsa bommatsalaagwe. Bagolo ba me ba bitsa mosadi wa me ngwetsi wa bone.

50. MELAO YA DITLHAKA

Go mefuta e mebedi ya ditlhaka tse re kwalang mafoko ka tsona, ké tse kgolo le tse nnyane. Tse kgolo di dirisiwa kafa melaong e e tlhomameng.

Molao oa re: Ha o kwala mafoko, o nne o simolle ka tlhaka e kgolo.

O mongwe oa re: Maina a otlhe, kapo e leng a batho, gongwe a ditšhaba, gongwe a mafatshe, gongwe a metse, gongwe a dithaba, gongwe a dinoka, gongwe a selo sengwe le sengwe se se teilweng leina, a kwalwa ka tlhaka e kgolo.

O mongwe gape oa re: Ha o feditse mmolelo, mme o beile ikhutso (.), gongwe sesupo sa potso (?), gongwe sa kgakgamalo (!), gongwe kgorwana (:), e

e tsenyang mafoko a a builweng, ere ha o kwalela pele, o nne o simolle ka tlhaka e kgolo. Phegelo (;) le phegelwana (,) ga di na molao oo.

O mongwe gape oa re: "Ee" wa go dumela o tshwanetse a nna a kwalwa ka tlhaka e kgolo le e nnyenye, go supa go re, ké "e" yo molelee. Sekao: A lefoko la lona la "Ee" e nne "Ee", la "Nyaa" e nne "Nyaa".

Go molao o mongwe o o reng, tlhaka e e buiwang go tsholeditswe lentswe, e bewa monwanyana o o supang kwa godimo, jaana: é. Mme monwana o, o bewa fela, ha go farologanngwa mafoko a a tshwanang. Ha ke re, ké motho, kea be ke re, ena ké motho. Mme ha ke re, kè motho, kea be ke re, nna ke motho.

51. TLHATLOGO



1. Go tlhatlogetse gona
Morena yo wa rona,
Kwa legaeng la gagwe,
Go dula teng le Rraagwe.
2. Jaanong re ka itumela,
Ka re tlaa mo fitlhela
Kwa o neng a le gona,
A ise a tle go rona.
3. A ile kwa go Rraagwe
Go rua tlotlo ya 'gwe,
E o neng a e tlogela,
Ha a tla go re swela.
4. Mme baengele bona,
Ba ba ntseng nae gona,
Ba mmaka ka difela,
Mme ba mo obamela.

5. Le rona bana ba 'gwe
 Re tlotla ina la 'gwe,
 Re rata go ya gona,
 Kwa o ileng, ra mmona.

6. Ka moso ha re fela
 Ka loso, re tlogela
 Lefatshe, foo Morena,
 Re itseele kwa go wena.

Ditlhogo tsa Ditema

Tsebe

1. Morafadinotshe	3
2. Modimo le motho	4
3. Bagolo le bana	6
4. A - E - I - O - U	7
5. Masimo le mabele	8
6. Modisa le dinku	10
7. Jehofa ké modisa wa me	11
8. Modimo oa re disa	12
9. Bo A B C	13
10. Thapelo ya mokrisete	15
11. Dithapelo tsa bana	16
12. Dithapelo tsa fa dijong	17
13. Sondaga le Kereke	18
14. Se Morena o se buang kaga Sondaga	19
15. Se ngwana o nang naso	20
16. Basimane ba babedi	20
17. Nonyane e rapela basimane	21
18. Seatla se se se keng sa itaya	22
19. Modimo wa me ké wa lorato	23
20. A ke na le manno kwa legodimong	24
21. Modimo o bona ntlheng tsoitlhe	25
22. Modimo o bona bana	26
23. Mogolodi le phiri	27
24. Boferefere bo bolaya mong'a jona	28
25. Segwagwa	29

26. Mpša e e megagaru	30
27. Phokojwe le podi	31
28. Diane tsa bagologolo	32
29. Ga kea tshwanela go aka	33
30. Segokgo	34
31. Jesu mo lewatleng	35
32. Tlotla rraago le mmaago	37
33. Mantsiboya	39
34. Sefela sa mantsiboya	40
35. Dipodi tsa go se utlwane	41
36. Phokojwe le phage	42
37. Mosimane le podi	43
38. Tlhoafalo e molemo	45
39. Legotlo la go leboga tau	46
40. Tsa bogologolo	48
41. Banyana, ratanang	50
42. Monna mo ngweding	50
43. Kopelo ya bosigo	51
44. Monnamogolo wa khumanego	52
45. Kodu le dikodunyana	53
46. Dinokwane tse tharo	55
47. Tiro ya Misione	56
48. Banyana mo baheiteneng	57
49. Ditshika le ditsala	59
50. Melao ya ditlhaka	60
51. Tlhatlogo	62